

\$2.6 juta baiki system tadbir badan tahun lalu



DANA BANTU BADAN: Dr Yaacob Ibrahim menyerahkan cek kepada Cik Shahrany Hassan (tengah) dari HyFy Ltd - antara 11 badan baru yang menyertai CLF tahun ini. Bersama mereka ialah CEO Yayasan Mendaki, Cik Tuminah Sapawi. - Foto KHALID BABA

29 Mar 2015

HAIRIANTO DIMAN

BANYAK badan Melayu/Islam telah memanfaatkan Dana Pembangunan Masyarakat Melayu/Islam (MMCDF) yang lebih besar - daripada \$1 juta kepada \$2.6 juta tahun lalu - antara lain bagi memperbaiki system urus tadbir mereka.

Sebagai contoh, Angkatan Karyawan Islam (AMP) menggunakan wang tersebut untuk memperbaiki system pengesanan pekerja social mereka.

Ini dinyatakan Menteri Bertanggungjawab bagi Ehwal Masyarakat Islam, Dr Yaacob Ibrahim, apabila ditemui media di acara penyampaian cek Forum Pemimpin Masyarakat (CLF) dan Forum Amalan Terbaik di Yayasan Mendaki semalam.

MMCDF ialah geran pepadanan tahunan yang diberi pemerintah bagi badan Melayu/Islam untuk projek yang mereka jalankan bagi meningkatkan prestasi masyarakat.

Mulai tahun lalu, geran itu ditambah daripada \$1 juta kepada \$2 juta setahun. Selain itu mulai tahun lalu, 20 peratus - atau \$600,000 – daripada geran pepadanan yang diberi pemerintah kepada Mendaki dan AMP disalurkan kepada MMCDF.

Ini menjadikan geran itu berjumlah \$2.6 juta setiap tahun kesemuanya.

Dalam acara semalam, Dr Yaacob menyampaikan cek kepada rakan kongsi CLF yang akan menjalankan pelbagai program tahun ini.

Penerima itu termasuk 11 rakan kongsi baru.

Antaranya ialah HyFy Ltd, badan yang membantu belia dari segi akademik dan kaunseling.

"Dengan dana yang diterima, kami merancang menjalankan dua program.

"Program pertama, Remaja Bertindak, memberi insentif kepada pelajar sering ponteng sekolah menyertai latihan bola sepak bersama Akademi Fandi Ahmad F-17.

"Kami akan bekerjasama dengan sekolah untuk mengenal pasti pelajar bermasalah seperti itu dan beri mereka peluang menjalani latihan bola sepak jika mereka berdisiplin dan menghadiri kelas.

"Program kedua, Menjadi Mentor Pesalah Remaja, member bantuan kepada pesalah belia kali pertama.

"Kami akan bekerjasama dengan bekas pegawai tentera serta polis dan mereka akan menjadi mentor kepada belia ini," kata Cik Shahrany Hassan, 39 tahun, salah seorang pengasas yang juga setiausaha HyFy Ltd.

Rumah Kebajikan Muhammadiyah (MWH), yang telah bekerjasama dengan CLF sejak 2008, turut menerima dana itu semalam.

Ia menggunakan dana yang diterima tahun lepas untuk menganjurkan persidangan Mengubah Insan, Memperkukuh Masyarakat November lalu sempena ulangtahun MWH ke-25.

Persidangan itu mengundang para pakar untuk berbincang tentang isu masalah belia dan kesihatan mental belia.

Turut diadakan semalam ialah dialog dan perkongsian pengetahuan antararakan kongsi CLF, Forum Amalan Terbaik.

Superintenden MWH, Cik Rahmatunnisa Abdul Majeed, mengongsi mengenai persidangan itu di forum tersebut.